

# La SRG SSR deditgescha sia dieta naziunala a la democrazia

Dieta naziunala da la SRG SSR a Cuira

■ (cp) La SRG SSR ha realisà venderdi passà a Cuira sia dieta naziunala. Il tema da la dieta è stà la contribuziun da la SRG SSR a la democrazia. La dieta è vegnida introducida d'in referat da Walter Thurnherr, il secretari general dal Departament federal per ambient, trafic, energia e comunicaziun (Datec).

Ulteriurs referents en stads Sonia Mikich, la charedactura dal Westdeutscher Rundfunk (WDR) e Martin Schulz, il president dal parlament d'Europa ch'è s'exprimi en in messadi da video davart il tema. L'ospitanta da l'occurrèza è stada la SRG SSR Svizra Rumantscha (SRG.R).

Venderdi passà ha la SRG SSR organisa per la quarta giada sia dieta naziunala. Questa giada ha quella già lieu a Cuira. L'ospitanta da quest onn è stada la SRG.R. Represchentants da tut las quatter regiuns linguisticas ed enconuschiders da la branscha èn s'occupads da la dumonda co che la purschida da program da la SRG SSR realisescha l'incumbensa democratica da costituziun, parlament e cussegl federal. Tenor la concessiun dal cussegl federal sto la SRG SSR contribuir a la furmaziun libra da l'opiniun dal public cun metter a disposiziun infurmaziuns variadas ed objectivas.



Discussiun tranter ils Charedactors da la SRG SSR, moderaziun Caspar Selg.

MAD

## Metter a disposiziun infurmaziuns variadas ed objectivas

Quest'incumbensa è complexa tant sin nivel da la politica sco da la cultura e sto adina puspè vegnir interpretada e komunitgada da nov. En opposiziun ad auters servetschs da service public sco la posta, la telecommunicaziun u il traffic public saja il service public tar las medias electronicas pli grev da mesurar, ha manegjà Walter Thurnherr, il secretari general dal Datec. La fixaziun dal service public audiovisual en Svizra saja ina dumonda dal puntg da vista, e quai pretendia blera mesira ad egl. Per il Datec

fetschia per exempel in scumond absolut per far reclama tar la SRG SSR betg senn, en spezial perquai ch'el mainia tar ina diminuziun nungiavischada da las finanzas. Plinavant na duai la SRG SSR betg vegnir transformada en in simpel furnitur da cuntegn («Content Provider»). Thurnherr ha numnà las contribuziuns localas e regiunalas sco elements centrals per la furmaziun da l'opiniun dal public. Tschertas purschidas da program dastgan ins dentant metter en dumonda e la SRG SSR duaja esser averta per quella critica. La SRG SSR è ina part impurtanta da la diversi-

tad mediala en Svizra, e quella saja fundamentala per ina democrazia che funcziunescha.

Martin Schulz, il president dal parlament d'Europa, è sa drizzà en in messadi da video a la dieta ed ha intunà ch'ina radiotelevisiun da dretg public, segirada finanzialmain, saja «indispensabla». Tenor Schulz haja l'antierur derschader administrativ tudestg Dieter Grimm tutgà la noda cun dir ch'ina radiotelevisiun publica saja necessaria, «pertge ch'ina radiotelevisiun commerciala che viva da la reclama e sto far in program lasuenter na contribuescha

betg avunda a la furmaziun libra da l'opiniun dal public».

## «Schurnalists duessan avair dapli ambiziuns ch'ina maschina da retschertga»

Sin quai ha la charedactura dal WDR, Sonia Mikich, fatg attent sin las difficultads da la lavur dal mintgadi tar la medias d'ozendi. I domineschia in «fetischissem per la sveltezza che ans rendia adina pli infurmà, senza dentant vegnir pli scort». Per Mikich sajan perquai reportaschas approfondadas muments-staila da la radiotelevisiun publica. Quai constettia oravant tut tar il schurnalis-

sem investigativ e tar las reportaschas da l'ester. «Schurnalists duessan avair dapli ambiziun ch'ina maschina da retschertga», di Mikich, senza emblidar il squitsch da spargnar che pertutga er la radiotelevisiun publica. Quella ha però il privilegi da betg stuair far plaschair als pussants. Cunquai ch'ella sa drizza a tuts stettia ella per integraziun en in temp cura che blers prefereschian da sa barattar cun personas da medema opiniun.

## Exempels concrets

Cun agid da differents exempels da la purschida da programs (emissiuns d'elecziuns e votaziuns, emissiuns da l'actualitad dal di, debattas, documentaziuns) han ils charedactors da la SRG SSR illustrà quant enavant che quella resguarda cun success sia rolla da mediatura tranter process democratics ed il public. Discutadas èn vegnidas tge offertas che promovon la democrazia e co che la SRG SSR chatta novs access a ses public. En spezial è vegnì menziunà il project «polit-box» per las elecziuns 2015 che duai permetter da cuntanscher in public giuven «cun discussiuns da e cun giuven e betg mo sur dals giuven».

Represchentants da la societad purtadra da la SRG SSR han lura approfondà las enconuschentschas ed identitgà las mancanzas e ristgas pertutgant las pretensiuns envers la SRG SSR. Ultra da quai è vegnì mussà il film «Die Demokratie ist los» da Thomas Isler che sa fatschenta en moda critica cun ils instruments da la democrazia directa en Svizra.

La dieta naziunala da la SRG SSR ha lieu ina giada l'onn. Ella vegn organisa da las societads purtadras da la SRG SSR ed è averta ad in public interessà. L'ospitanta da l'occurrèza è stada la SRG SSR Svizra Rumantscha (SRG.R).